



Kristo Anaitukuza

Sheria

Bwana akapendezwa, kwa ajili ya haki yake, kuitukuza sheria, na kuiuadhimisha.—Isaya 42:21.

Kama sheria ingeeleweka mbali na Kristo, ingekuwa na nguvu ya kuteketeza kwa watu wadhambi, na kumfutulia mbali mwenye dhambi. Lakini kwa kuelewa sheria kuhusiana na Yesu, akimpokea Yeye kwa imani kama mbadala wake na mdhamini wake, mwanadamu anajiona kuwa mfungwa mwenye tumaini. Ukweli kama ulivyo ndani ya Yesu ni kuijua na kuifanyia kazi sheria ya Mungu iliyo takatifu, ya haki na njema, kadiri sheria hii inapoinuliwa, na kuoneshwa kutokubadilika kwake katika Kristo. Aliitukuza sheria, akafafanua kila kanuni yake, na katika kuitii Kwake alimwachia mwanadamu mfano, ili kwamba yeye pia atimize matakwa ya sheria....

Maumivu ya bustani ya Gethsemane, matusi, dhihaka, dhuluma, alizorundikiwa Mwanampendwa wa Mungu, vitisho na fedheha ya Kusulubishwa, hutoa udhihirisho wa kutosha na wenye kugusa hisia kwamba haki ya Mungu, inapoadhibu, hufanya kazi hiyo kikamilifu. Ukweli kwamba Mwanawe mwenyewe, mdhamini wa mwanadamu, hakuachwa ni hoja ambayo itasimama milele mbele ya mtakatifu na mwenye dhambi, mbele ya ulimwengu wa Mungu, ili kushuhudia kwamba hataacha kuchukua hatua dhidi ya mvunja sheria Yake.

Mungu ni upendo. Ameuonesha upendo huo katika zawadi ya Mwanawe mpendwa. Lakini bado upendo wa Mungu hautolei dhambi udhuru. Mungu hana udhuru wa dhambi kwa Shetani, kwa Adamu, au kwa Kaini, na hataacha kuchukua hatua dhidi ya dhambi katika mtoto yeyote wa wanadamu. Tabia potovu ya mwanadamu inaweza kupotosha upendo wa Mungu katika sifa ya udhaifu; lakini nuru inang'aa kutoka msalaba wa Kalvari, ili kwamba mwanadamu aweze kuwa na mtazamo sahihi na kushikilia nadharia ambazo hazijapotoshwa.

Mungu ametoa sheria Yake kwa ajili ya udhibiti wa mwenendo wa mataifa, familia na watu binafsi. Hakuna mtenda maovu hata mmoja, haidhuru dhambi yake ni ndogo na ya siri zaidi, ambayo huepuka kushitakiwa kwa sheria hiyo. Kazi yote ya baba wa uongo imeandikwa katika vitabu vya amri vya mbinguni; na wale wanaojitoa wenyewe kwa ajili ya utumishi wa Shetani, ili kuwatolea watu uongo wake kwa amri na matendo, watapokea kulingana na matendo yao. Kila kosa dhidi ya Mungu, hata kama ni dogo sana, limetunzwa hadi katika siku ya kutoa hesabu. Na upanga wa haki utakapotwaliwa mkononi, utafanya kazi iliyofanywa kwa Mungu Mwenye kuteseka. Haki itatendeka; kwa maana chuki ya Mungu juu ya dhambi ni kali na ni ya kuangamiza kabisa.

Ukweli kama ulivyo ndani ya Yesu utatoa mafundisho ya muhimu mno. Itaonesha kwamba upendo wa Mungu ni mpana na wa kina; kwamba hauna mwisho; na kwamba katika kutoa adhabu kwa wasiotii, wale ambao wameibatilisha sheria ya Mungu, hautakuwa na maridhiano. Huu ni upendo na haki ya Mungu vikiwa vimeunganishwa. Unafika kwenye kina kirefu cha huzuni na udhalilishaji wa mwanadamu, ili kuwainua walioanguka na kukandamizwa ambao wameushikilia ukweli kwa toba na kwa imani katika Yesu (The Review and Herald, Februari 8, 1898).